

# Аёлларнинг юзларини ёпишлари фарзми?

14:18 / 24.04.2016 4877

Мен бир шаръий ҳукмни тушунмаяпман: агар аёл кишининг юзини ёпиши фарз бўлмаса, Аҳзоб сурасининг 59-ояти тафсирини тушунтириб берсангиз. Аёлларнинг юзини ёпиши фарз эмаслигига Қуръон ёки ҳадисда бирор маълумот борми?

**ЖАВОБ:** Аллоҳ таоло Аҳзоб сурасида айтади: «Эй Набий, жуфтларингга, қизларингга ва мўминларнинг аёлларига айт: жилбобларини ўзларига яқин қилсинлар. Ана ўша уларнинг танилмоқлари ва озорга учрамасликлари учун яқинроқдир. Аллоҳ ўта мағфиратли ва раҳмли зотдир» (59-оят).

Ушбу оятда Аллоҳ таоло Пайғамбаримиз соллаллоҳу алайҳи васалламга аввало ўз жуфтлари ва қизларига жилбобларини ўзларига яқинлаштиришни буюришга амр этмоқда. Чунки Пайғамбаримиз соллаллоҳу алайҳи васалламнинг завжай мutoҳҳаралари ва қизларининг шарафлари улуғ бўлгани учун бу ишни ҳаммадан олдин улар қилишлари лозимдир.

Жилбоб устдан кийиладиган ёки ёпиладиган кенг кўйлак ёки лиbosдир. Мўмина аёлни бошқа аёллардан ажратиб турадиган бу кийим турли мусулмон ўлкаларда турлича бўлган. Лекин ҳаммаси ҳам мўмина аёлни ёмон кўздан сақлаш, уни бошқа аёллардан ажратиш каби вазифаларни адо этган.

Жоҳилият даврида аёллар очиқ-сочиқ юришар эди. Турли кийимлар кийиб, кўча-кўйда эркакларнинг эътиборини ўзларига тортишга ҳаракат қилишарди. Шунинг учун фосиқ ва фожирлар ҳам улар ортидан тушишган, гап отишган, турли қилиқлар қилишган. Ўша фосиқ ва фожирларга мўминлар эътиroz билдириб, Ислом дини мўмина аёлларга бундай муносабатда бўлишни ман қилганини айтганларида, улар: “биз буларнинг мўмина эканини билмабмиз, мўмина эмас, балки чўри бўлса керак, деб ўйлабмиз”, дейишган. Ушбу ояти карима нозил бўлганидан кейин эса, шароит тамоман ўзгарган.

Бу оятда аёл киши юзини ёпиши ҳақида ҳеч гап йўқ. «Юз» сўзининг ўзи йўқ. Юз сўзига ишора қиласидиган бирор ҳарф ҳам йўқ. Бу борада машҳур «Хидоя» китобининг муҳтасарининг муҳтасари бўлмиш «Муҳтасари Викоя»

китобининг матни ва шарҳида қўйидагилар айтилади:

«Хур аёлнинг жамики бадани авратдир. Юз, икки қўл ва оёқ бундан мустасно». Бу ҳукмнинг далиллари: Аллоҳ таоло «Нур» сурасида: «Сен мўминаларга айт: «Кўзларини тийсинлар, фаржларини сақласинлар ва зийнатларини кўрсатмасинлар, магар зоҳир бўлган зийнатлар бўлса (майли). Рўмолларини кўксиларига тўсиб юрсинлар», деган (31-оят).

Зоҳир бўлган зийнатлар деганда намозда юз, икки оёқ ва икки кафт англанади. Намоздан ташқарида икки оёқ ҳам авратдир.

«Рўмолларини кўксиларига тўсиб юрсинлар». Яъни, бошлариға ўраган рўмоллари фақат соchlарини эмас, балки томоқлари, кўксилари ва кўкракларини ҳам тўсиб турсин.

Имом Абу Довуд Оиша онамиздан ривоят қилган ҳадисда у зотнинг олдилариға опалари Асма бинти Абу Бакр юпқа кийим билан кирганларида, у ерда ўтирган Расулуллоҳ соллаллоҳу алайҳи васаллам юзларини ўгириб олганлар ва: «Эй Асма, аёл киши ҳайз кўрадиган бўлганидан кейин ундан мана бу ва мана бундан бошқа жойи кўринмаслиги керак», деб икки кафтлари ва юзлариға ишора қилганлари айтилган.

Иbn Жарир Табарий тафсирларида Оиша онамиздан келтирган ривоятда у киши бундай дейдилар: «Олдимга она бир акам Абдуллоҳ ибн Туфайлнинг қизи зийнатланган ҳолда кирган эди. Расулуллоҳ келиб қолдилар ва юзларини ўгиридилар. Мен: «Эй Аллоҳнинг Расули, бу она бир акамнинг қизи, ёш қиз», дедим. У зот соллаллоҳу алайҳи васаллам: «Аёл киши балоғатга етганидан кейин ундан юзи ва мана бу жойларидан бошқа жойи кўриниши ҳалол эмас», деб ўз билакларини тутамлаб кўрсатдилар. Ушлаган жойлари билан кафтлари орасида яна бир тутамча жой қолди» (Аллоҳ билувчиидир).